



Ai **16 di Zenâr dal 2009**, intun blog nassût su Splinder, a vignivin publicadis **lis primis dôs contis** di **un projet di narative curte par furlan sul web** che al cjapave la sburtade dai tancj blog di chei timps e la doprave par meti dongje web, contis e marilenghe. La idee e jere di creâ un alc che par talian 'nd jerin une vore e par furlan al mancjave: **un puest virtuâl dulà che si puedi lei e publicâ storiis curtis di ogni gjenar**, magari modernis, che si puedin comentâ o ancje criticâ, ma che dut chest al stici a scrivi e lei par furlan. La idee e veve cjapât cuarp a Udin, cualchi setemane prin, intune frascje dongje sant Jacum, denant di doi tais - un blanc e un neri - e doi crostins persut e cren. I doi sentâts tal taulin a jerin Rafaël Serafin, che us sta scrivint, e Dree Venier. Chei doi no si jerin mai viodûts prin di chê volte.

Il non, saltât fûr cuasi subit, al jere **CONTECURTE**.

Vuê a son passâts 10 agns e Contecurte, la Ostarie Leterarie, e je ancjemò chi, devant dal vuestri nâs, e **la ultime conte publicade dal Ostîr un moment fa e je la numar 800, e l'articul publicât al è il numar 1000**.

Dîs agns a son tancj. Tal web a son une infinitât, e nol è facil che un sît - se pûr cui siei sù e jù - al duri tant. Il blog al è passât di Splinder a Blogspot, al à vudis polsis e moments di sucès, al è jentrât **te vite reâl cun tancj spettacui** e ancje un pôc tes scuelis. **Al à fat scrivi int che forsit no varès mai scrit par furlan e neancje mai scrit, e al à fat lei int par furlan che magari prime no jere usade a fâlu** e magari e à imparât ancje cualchi regule di grafie o gramatiche. Di un an in ca al è diventât un sît. In dîs agns **nus àn dât une man in tancj**, a partî dal famei Checo, mûr di fonde de ostarie, a camarîrs, garzons, camarelis, massariis, berlons, cjantôrs, sartoris, coghis e tancj che a son masse par rivâ a visâsi di ducj. E in tancj a van indevant a dâusale ancje cumò, une man. Ma dîs agns ancje inte vite, a son tancj. O vin viodudis rivâ personis gnovis e 'nt vin viodudis lâ vie, cualchidune ancje par simpri. Da rest, o sin une ostarie, e o sin un struc de agregazion umane e des sô dinamichis.

In dîs agns, cun di plui, ancje il mont al è cambiât, e al va in piês. Noaltris o fevelin une lenghe piçule. **Une lenghe piçule, puare e bielissime, ma che come ducj i piçui, i**



puars e i diferents a scugnin simpri difindisi. Si che, Contecurte, sedi l'ostîr che us sta scrivint, sedi i siei colaboradôrs di cumò e di prin, la intindin come une ativitât di resistance, di difese di alc di biel e diferent che o vin gust che al resti. E no cjacarìn dome di contis. Lis contis a son dome il spieli di chest alc.

Di dut chest, **lis contis a son ce che al reste. Lis contis a son dutis achì, che si puedin ancjemò lei, insieme ai comentis e a lis emozions che ognidune e da.** E alore, dutis chestis peraulis, a sono par dîsi: BON COMPLEAN CONTECURTE!

E ce fasìno par festegjâ? Ce si fasie a un che al finìs i agns?

Facil! Si à di fâi un regâl!

E alore o sês visâts. A partì di cumò e intai prossims dîs, ducj voaltris, **contecurtârs** di cumò e di une volte, contecurtârs mancjâts e scjampâts, e parcè di no, ancje contecurtârs di doman, se o volês diventâlu, insome... **o viodarês rivâ inte vuestre pueste une idee par regalâ une conte gnove ae Ostarie.** La idee us al à darâ l'Ostîr tirant i siei dadui magjics che a coventin par scrivi storiis. **4 dadui di interpretâ e di fâi sù une storie che e ziri ator des solitis 2000batudis** une vore elasticis.

Lui, l'ostîr, al à za tacât, e **la conte che viodês chi daûr e je saltade fûr di chescj dadui** (sì, sì, dadul nus fâs schifo ancje a nô, podês lei dados, come che sin usâts a dî) e e je il so regâl ae Ostarie, ma meteit dongje ancje la la cuistion di tirâ cuatri dadui, che si fâs fature.



E no je finide. **Dopo 10 agns di Osterie, nus pâr il câs ancje di meti dongje une cene, par cjatâsi chel che al pues e al vûl.** Cumò pensìn a une date, e viodìn di proponi ancje chê. Ma intant, tachìn a invidâ la int a... fanûs il regâl! (E se al è cualchi contecurtâr che al à voie di vê une butade di dadui, par scrivi une conte, baste che al **scrivi une mail** o **nus contati su fb**).

E cumò vonde peraulis, un grassie a ducj e... **BON COMPLEAN CONTECURTE!!!**

I regâi ricevûts di Contecurte par il so complean:

1. **Clap clap clap**, Rafaêl Serafin, l'Ostîr
2. **La pension**, Checo Tam, il Famei
3. **Culture in semence**, La Fuguline, la Coghe
4. **Secs ma bogns**, Margarite Cogôi, la Massarie
5. **I dadui dal destin**, Galliano di Buenos Aires
6. **Ufos che rivin e no tocjin**, Barbara Battel
7. **Il câs de cassele di len**, Massim Furlan

8. **Cui savê!**, di Laurin Zuan Nardin
9. **L'agâr de Lyon e il disc volant**, di Renzo Brollo
10. **Almost blue**, di Stiefin Morat
11. **Libertât obleade**, di Gianfranco Pellegrini, il Garzon
12. **Lassâsi lâ**, di Michêl Londar, il Berlon
13. **Problemis di siôr**, di Michêl Vuardianut Calligaris
14. **Storie di Bulletto e di une femine di Palaçûl** di Done Bete
15. **Nart e Juine** di Luciano Marinig
16. **L'om che al rimbalzave simpri** di Stralunade, la Sartore
17. **La partide di balon** di Maurizio Di Fant
18. **Il vecjo su la coline** di Maghe Olstrele
19. **Nol è migo just** di Gianluca Franco
20. **Tristeriis** di Pablo Gortan, il Cramâr
21. **Il bosc di Vico** di Luciano Marinig
22. **Lâ daûr dai siums** di Egle Taverna